

Driek geet stamm'n: kiesdrempeltjen

As trouwe lêzer weet ie ut misgien nog weh: veurugge keer dee-j ik nog met an de vekiezing'n. Nit da'k noe heele apatte idee'j'n hadde, moar ik dache a'k noe vier joar un zeetel hebbe in de kaamer en net as de res af en toe is opdraave en af en toe is un beetje ja en amen knikke, he'k tog noa un joar of viere mooj wat kwatjes op de banke. Nou ja, um un lang vemaal kort te maak'n, met allenig moar stamm'n van miezelluf en mien vrouwe kwam ik tog eg nit vedder dan un zeet'l veur de open haard. Dus ik denke dat doa'k dit joar mar nit weer. Afijn, dus mo'k moar is kiek'n woar ik dan op mot stamm'n. Dus ik denke: ik stemme dit joar op de partije die teeg'n cooroonaa is. En wat denk ie? Van de zeuvenendartug partij'n is d'r gin ene teeg'n cooroonaa! Dus ja, noe weet ik ut helemoale nit meer. Ja, ik weette weh un poar partij'n woar ik zeek'r nit op stemme: Forum veur Domboos – of is ut noe veur Doakus? – det wöt nit mien partije en ok de Partije veur de Arbeid loa'k links ling'n... want a'k ergens un hêkel an hebbe is ut arbeid, want doar wo-j meu van. En dat bleekwaat' rheufd wöt um ok nit. Ik zatte nog eff'n te denk'n an JA, moar ik denke toch van Nee. Nou, wie hept de keuze al oarug uut-e-dunt, vi'j nit? Partije veur de dier'n dan, denk ik onder ut èt'n, moar ja ik zatte net an mien karbonaatjen te peuzel'n, dus tja da's ok zo wat. Moar noa lang wikk'n en wèg'n bin'k d'r weh uut: ik stemme op BBB. Want doar zit onze eigenste Friezewiekse Wim Groot Koerkamp in. Weliswoar as nummer 26 op de Kieslieste moar tog.... Nummer 26 dat is zeg mar da-j kunt zegg'n da-j bie Ajaks voetbalt, moar nit in de basis stoat, ok nit op de reservebanke moar heug en dreug op de triebuune as doar teminst'n genog ruimte is. Moar tog: hi-j steet op de lieste van BBB. En ik heb e-heurd dat det steet voor Billen, Bier en Braadwost. En zeg noe eerluk, welke keerl is doar noe nit gek op? En ach Wim, ik weete nit of ie un open haard hebt, moar ie weet veur de vekiezing'n in ieder geval ah zeeker da-j ok de komende vier joar weer mooj op oe eig'n zeetel van ut knapperende holt kunt geniet'n. Mens'n, woar je op stemt, maakt mie gin moer uut, a'j moar stemt. En eh a-j goat stamm'n, pas dan op ut kiesdrempeltjen, doar ku-j smeerug oaver struukel'n....

Driek van de Oerdiel